

Kolegio eta garraiorako laguntza ukatu egin dio Seaskari Kontseilu Nagusiak

RPRkoek eta biarnesekek ikastolen aurkako iritzia plazaratu zituzten

Seaskaren aldeko diru laguntzaren gehitzea ez du onartu Pirinio Atlantiar Departamenduko Kontseilu Nagusiak. Joan zen astelehen arratsalde bukaeran François Bayrou Kontseiluko lehendakari eta Hezkuntza Nazionaleko ministroak proposaturiko Xalbador Ikastegiaren eta garraioaren aldeko diru laguntzei ezatza eman zieten RPR alderdikideek eta Biarnoko kontseilari gehienek.


MIXEL ESTEBAN / PABE

Bayrouk proposatzen zuena, Seaskarekin itun berria izenpetzea, ez zuten onartu 30 kontseilariak. Kontseilu Nagusiaren lehendakariaren alde 17 baizik ez ziren. Bayrouk, Aurtengo aurrekontu orokorrean sartu behar zen 425.000 liberako (9 milioi pezeta) gehitzea proposatu zuen. Ez handia izan arren —aurrekontu osoa 2.224 milioi liberakoa (46.704 milioi pezeta) da— Kontseiluaren eztabaida oso politikoa izan zen. Euskara eta euskal kulturaren aurkako iritzi orokorra nabari zen asteleheneko erabakiaren gibeletik.

Azken urte hauetatik Kontseilu Nagusiak 250.000 liberako (5,25 milioi pezeta) diru laguntza ematen dio Seaskari. Diru laguntza hau bozkatu zuten urtearen hasieran 1993ko aurrekontuaren lehen zatian. Bigarren zatirako bilera izan zen astelehenean. Kontseilariak erabakia hartu behar zuten Kanboko Xalbador Ikastegia kolegioarentzako diru laguntzaz (125.000 libera edo 2,6 milioi pezeta) eta ikasleentzako garraioa beren gain hartzeko (300.000 libera edo 6,3 milioi pezeta). Azken puntu honi buruz, erran daiteke Seaskako gastuak 450.000 liberakoak (9,45 milioi pezeta) direla.

Bayrouk berak aurkeztu zuen Seaskaren aldeko proposamena, adieraziz «ikastoletako lana zuzena baita, gure hizkuntzak salbatzeko langileak ohoratzen» dituela. Gaineratu zuenez, «sustraiak gabe ezin da bizi. Ondarearen zati diren hizkuntzak galtzera utzi behar ez diren altxorak dira». Jean Pierre Destrade PSko kontseilariak Bayrouren proposamena onartu zuen erranez inizatiba hau «bake zibilaren alde-rakoa» dela.

Oposizioa RPR alderditik eta Biarnoko kontseilarietarik heldu zen. Departamenduko RPRko hautetsi guztiek aurka bozkatu zuten eta baita Biarnoko sozialistak ere. André Gracianne



Michel Intxauspek Seaskaren kontra bozkatu zuen.

M. E.

Iparraldeko kontseilari gehienak Seaskaren alde

M. E. / PABE

■ Pirinio Atlantiar departamenduko hemeretzi kontseilarietarik hamaikak Seaskari buruz Bayrouk eginiko proposamenaren alde bozkatu zuten. Honako hauek dira aipatu kontseilariak: Mixel Arhantzet (Atharratze), Jean-louis Cazet (Iholdi), Léopold Darrichon (Bastida) eta Jean Grenet (Baiona Ekialdea) independenteak; Jean-Pierre Destrade (Hiriburu), Raphaël Lassalette (Hendaia) eta Jean Lougarot (Maule) PSkoak; Michel Bonnet (Angelu Hegoaldea), Jean-Louis Domergue (Ba-

iona Mendebaldea), Jean-Jacques Lasserre (Bidaxune) eta Juliette Séguéla (Miarritze Ekialdea) UDFkoak.

Seaskari dirulaguntza berria ematearen aurka agertu ziren RPRkoak: Jean-Michel Colo (Uztaritze), Jacques Coumet (Hazparne), Franz Duboscq (Donapaleu), André Gracianne (Angelu Iparraldea), Michel Intxauspe (Garazi), Christian Millet-Barbé (Baiona Iparraldea), Paul Ricaud (Donibane-Lohizune) eta Armand Saury (Miarritze Mendebaldea). Gabriel Dermitek (Baigorri) eta Louis Genin-ek (Ezpeleta) ez zuten botorik eman.

(RPR) Angelu-Iparralde kontonamenduko kontseilariak adierazi zuen arazoa konponduko dela Seaskak hautua egingen duen erabakirik zerbiztu publiko edo pribatuaren artean. Bere ustez, Kontseiluak ez du esku sartu behar Seaskaren finantzaketan.

Jean Grenet Baiona-Ekialdeko kontseilariak, alde bozkatu arren, adierazi zuen «iragan denboretan Seaskaren animatzaileak inplikatuak izan dira mugimendu abertzalearen ekintza terroristetan. Gaurtik goiti irakasle batzuk terrorismo ekintzetan inplikatuak baldin badira, ituna gelditu egin beharko dugu berehala».

SEASKAK Filipe Goietxe
INTXAUSPE Seaskako lehen-
SALATU DU dakariak Michel

Intxausperen jarrera salatu zuen gogor Kontseilu Nagusiaren erabakia baloratzeko atzo egindako hitzetan: «Garazi eskualdeko diputatu eta kontseilari nola izaten ahal da Parisen eskolen arteko tratamendu berdinen alde eta Paben aipatu berdintasun honen kontra?», esan zuen.

Seaskako lehendakariak Kontseiluaren erabakia salatzeaz gainera aurrera segituko dutela esan zuen: «Bozka ezezkor honek, beren haurrentzat ikastolaren hautua egin duten familiengandik, zuzen kontra eta bereizketa egoera honi buruz, sortzen duen damugarritasun eta herrak ez gaitu trabatuko gure ikustatearen adieraztera, beren bozka baiko-rraren bidez, gauzak zuzentzeko xedea agertarazi dutenei. François Bayrouk gure kultur ondaren zabalkuntzari lotu kalitatezko hezkuntza bideen hedatze-ko ardura bakarra dugularik gutan, partaide bermatzaile bat aurkitzen segituko du», esan zuen Goietxek.

Ikasleen % 40 bakarrik matrikulatuko da A ereduan EAEn datorren urtean

LUIS KARIOS GARCIA / GASTEIZ

EAEko aurrematrikulazio osoa 247.000 ikaslekoa izan da, eta ereduak, euskal ereduak ia % 60 dute, A ereduak % 40 baino ez duen bitartean. Avilak nabarmendu zuen joerak hala segituz gero D ereduaren «nagusitasuna» gertatuko dela 3tik 16ra urte bitarteko ikasleei dagokienez.

Hizkuntz eredu eta sarearen arabera datuak emanda, Avilak ondorioztatu zuenez, «gure sisteman gehien euskalduntzen duen sarea publikoa dugu». Sare publikoan B eta D ereduak aurrematrikulazioa hurrenez hu-

rraren pribatuan baino % 9 eta % 7 gehiago dela esan zuen. Pribatuak ere gora egin du euskal ereduaren, «baina ikastolen konfluentziaren ondorioz», adierazi zuen Avilak.

Sare pribatuan geratu ala publikora biltzeko iragan maiatzaren 25ean Euskal Autonomi Elkarteko ikastolek hartutako erabakien ondotik datorren ikasturtean sare pribatuak izango duen ikasle kopurua sare publikokoa baino handiagoa izango da. Zehatz-mehatz, pribatuak % 52 edukiko du eta publikoak % 48, iazko ikasturtean publikoak pribatuak baino hamar puntu gehi-

ago izan zuen bitartean.

Datuok Lakuan eman zituen atzo Jose Luis Avila Eusko Jaurlaritzako Hezkuntza sailburuordeak, Haur Heziketa, Oinarrizko Hezkuntza Orokorra eta Heziketa Berezian 1993-94erako aurrematrikulazioari buruzko lehen zenbakiak ageri zituen.

Sare pribatuaren nagusitasuna badago Gipuzkoan eta Bizkaian, % 55 eta % 52,4ekin hurrenez hurren. Araban, aldiz, publikoa da aurren % 55,7ekin.

Demografia beherakada aurren ere nabariko da eta 1992-93an baino 15.293 ikasle gutxiago izango da 1993-94ean.

Pribatu segitzea erabaki dute Azkoitiko eta Azpeitiko ikastolek


J. ALDAI / DONOSTIA



Besteak beste Azpeitiko eta Azkoitiko (Gipuzkoa) ikastolak biltzen dituen Izarrazpe kooperatibak bere titularitate administratiboa Administrazio publikoaren esku ez uztea erabaki du. Hau da, juridikoki pribatu izaten jarraitzeko erabakia hartu zuten astelehen gauean egindako bozketan, sare publikoan sartzeko aukera egin zuten bazkideek gehiengo bai, baina jabetza aldatzeko adinako bi herenen gehien- gorik ez zutelako lortu.

Nahikoa gaiztotua dago giroa bi ikastolotako guraso hainbaten artean eta astelehen gaueko batzarrean ere argi geratu zen hori. Iluntzeko zortzi t'erdietan hasi eta gaueko hamaikak arte iraun zuen batzarrean jende ugari —1.363 lagun— hartu zuen parte eta eztabaida gogorak eta zalaparta handia ere izan ziren. Sare publikoaren alde 841 lagunek (% 63,37) bozkatu zuten eta pribatuaren alde 503k (% 36,42). Ondorioz, pribatu segituko dute Azpeitiko eta Azkoitiko ikastolek eta balio gabe geratu da kooperatibako batzordeak Hezkuntza Sailari lehengo bozketaren ondotik bidali idazkia, zeinetan titularitatea Administrazioaren esku uztea erabaki zutela adierazi zioten.

Hitz egiten segitu beharra nabarmendu zuten batzuek eta besteek. Aukeraturako bat OHO eta BBB juridikoki banatzekoa litzateke, OHO pribatuan uztea eta BBB publikoan.



Jose Luis Avila.

OLALDE